

45897
10
I. N. J.
SPICILEGIUM MEDICUM

De
P E S T E,

Quod
PRÆSIDE

GEORGIO VVOLFF-
GANGO WEDELIO,

Med. Doctore, Theoretices Professore
Publico, Consiliario & Archiatro Ducali Saxon. S. R. I.
Natur. Curios. Adjuncto,

Patrono ac Præceptore æviternum colendo,
Publicæ Philiatricorum Examini subjicit

JOHANNES BERNHARDUS Winterbach/
Rotenburgo-Tuberano - Francus,

In Auditorio Medicorum, horis consuetis,

Ad Diem Junii M DC LXXXV.

J E N Æ,

Literis KREBSIANIS.

45847



Proæmium.



Lauso theatro meminisse tamen licet actuum habitorum, seu lugubre exemplum, seu latum propositum fuerit. Messe factâ spicilegium nemini vertitur vitio. Idem nobis liceat circa pestem, morborum omnium dirisimum.

Occeperat is Anno M D C L X X I X. in Germaniâ depopulari urbes, agrosque. Inde, Viennâ Austriæ digrediens, in meditullium Germaniæ penetravit, Pragâ, Dresdâ, Lipsiâ, mirè quassatis. Quâ sede relictâ Magdeburgum, Islebiûm, Northusam, Mülhusam, Erfurtum, exercuit, ut plura non memoremus idem experta loca.

Ibi verò tractatus plurimi & consilia de eodem malo truculento habita, scripta, promulgata, necessario partim, partim curioso labore, ut frustrâ videri posset & actum agere, si de eo amplius differere sustineamus, post, quàm M. D C L X X X I V. Januario mese esse desiit & sævire.

Ut pacis tempore de bello cogitandum est, & nunquam de hoste avertendo consultatio in republicâ est frustranea: ita nemo nobis vitio vertet, si de peste agamus, quamvis, quæ summa Dei O. M. est gratia, nulla in Europâ vel Germaniâ pestis visenda sit amplius; quod ut feliciter eveniat, faxit supremum Numen!

N nullo morbo τὸ Θεῖον, *divinum*, ab Hippocrate, licet Ethnico, primò notatum, magis occurrit, quàm in peste; An, ut digitum Dei attendant homines & Christiani, sæpè negligentes aliàs hanc curam, imò non rarò ἀθεοί? Non à causâ naturali oritur morbus, & naturales tamen edit effectus. Non ab aëre corrupto, & ab aëre tamen emoritur. Optimè dispositi corripuntur morbo, optimè curati moriuntur, & vicissim pessimè dispositi evadunt, negligentes neglectivè curantur, vel à morbo intacti manent & liberi. Quis non in hoc agnoscat vim superiorem dirigentem, & à tergo saltem sentiat, non casu id contigisse, vel citra τὸ Θεῖον?

§. 2. Est verò & hoc peculiare, habere quid altius in recessu pestem, quàm primâ fronte pateat, sub notâ veste occultum condere habitum. Seu, ut dicamus clarius, iis visenda est symptomatibus, quæ nota, quæque manifesta sunt satis, unde jam dudum asseruère quidam, pestem non certi morbi nomen esse, sed multis morbis, qui contagiosi sunt, & plurimos interimunt, convenire. Adeò pluribus se adsociat, vel illos potius in sui contubernium adsciscit, latentius malum. Vix enim nominari potest morbus, in humorum consistens hospitio, qui non pesti comes aliquando fuisse legatur.

§. 3. Inde jure merito universalissimus fuerit vocandus, non tam quoad individua solùm, singula exposita periculo, erumpente contagio, nisi quem Deus protegerit; quàm quoad individui partes, & morbos affligere solitos aliàs. Pestem si dixeris, omnium morborum lernam, omnium symptomatum compendium dixeris. Et maximè quoad principia vitalia id verum est, ex quo ceu fonte omnia manant & dependent reliqua.

§. 4. Sin, perspectâ ejus facie & naturâ, DEFINIRE eandem velimus, Pestis est febris malignissima & acutissima,

tissima, à fermento rarefactivo venenoso, feminali, specifico, latenter illato, & in principia vitalia sæviente, producta.

§. 5. Genus est febris, morbus universalis, quo tertia pars hominum moritur, etiam extra pestem. Utut enim communiter febrim & pestem contradistinguant, non pauci, quod pestis videatur invadere nec sine febris, signa hujus se tam exactè semper exerant, morientibus ægris *ορθοδοξον*, ut plura non laudemus; Attamen si attendantur gradus intemperiei & malignitatis, facile res expediri potest. Si hæc major fuerit, obscuratur quasi intemperies, neque tamen idcirco abest. Hinc & intemperiem malignissimam, quam ipsi illi admittunt & ponunt, citra febrim esse posse vix videtur concedendum, cum ea sit universalis, cum sit, saltem respectivè, calida, cum in sanguineâ massâ, quod citra febrim fieri nemo facile persuaserit.

§. 6. Satis est, idem in peste longè maximè, quod in omnibus malignis, esse attendendum. Non sola spectanda intemperies, sed malignitas seu mos hujus intemperiei, *κακότης*, & quidem essentialis ac inseparabilis. Commune est omnibus febribus malignis, ut quo major sæpè malignitas, eò intemperies seu calor efferatus sit, minor, imò ad sensum & apparenter quasi nullus. Neque in peste ratio dari potest, secus si sentiamus, quomodo alia pestis sit sine febris, alia cum febris, utrobivis iisdem causis & phænomenis præsentibus.

§. 7. Quando ergò febrim malignissimam & acutissimam dicimus, hoc ipso à FORMALI RATIONE differentiam specificam notamus, quam & à causâ desumpta reliqua inferunt. *Malignissima* est, quia magis insidiosa & subdola reliquis, quia majores strages edit, & opinione citius necat, quia elementa vitalia subruit vel destructum ita *δεσποτική βία*, magis timenda malignitate hæc, quàm intemperie. *Acutissima* itidem est tum ob dicta, tum ob

terminum, seu finem, & effectum causæ respondentem. Adeo enim defavit in corpora affecta, ut intra triduum necet; quod si superaverint, ad acutiores declinat, seu ad diem septimum perdurare potest, maximâ tamen cum latitudine; Et ultra hunc terminum progressa acutas denique simplices exprimit, ad decimum quartum diem & amplius exporrecta, quod in lue affectis toto die observari solet.

§. 8. Unâ verò sic, vel tacentibus nobis, patet, ubinam & in quibus partibus tanquam SUBJECTO in hæfionis sedem suam figat pestis. Non in ventriculo, nisi adæquatè, quod ibi se exerat veneni vis quoque, ubi fomitem apparat pro redintegrandis sanguine & lymphâ, quod per vasa arteriosa, per nervos illuc maturè feratur, ut ibi putetur primitus pullulare, ubi jam fructus suos venenosos exerit. Dari tamen casus non negamus, ubi per os quoque ad ventriculum contages venenosa fertur, sed non ibi requiescit, mox ulterius ad vitalem sphæram abrepta.

§. 9. Neque concinnum videtur, si divulsum spiritum vel archeum pro subjecto agnoscamus, in quem ultimatè omnis morbus resultat; sive sanguinem, sive cor hoc titulo veneremur scorsim, sine isto. Sufficienter omnia phænomena testantur, ipsi flammæ & luculæ vitali centraliter perniciem strui, & spiritibus & humoribus concurrentibus. Non enim spiritus sine humoribus, nec humores sine spiritibus, neutri citra insitam illam vitalem scintillam, sed omnes conjunctim, ut causæ sociæ & collectivè sumptæ, verbo principia vitalia afficiuntur πῶτος & principaliter. Indeque omnes partes, quæ ex hoc fonte hauriunt undas suas & vitam, secundariò & adæquatè magis pati par est.

§. 10. Sin subjectum secundarium, seu effectuum consequentium, lustremus, speciale illud geminum occurrit, quod non minimum ad pathologiam morbi facit; unum

unum indefinitum, corpus totum, hinc inde, quorsum appellit sanguis infectus lue, tum extrinsecus, tum intra viscerum mœnia, ut de ventriculo speciatim verum est, hinc & de aliis, pro carbunculis & petechiis quoque; alterum definitum, glandulæ, feri excipula & cribra propria, pro bubonibus, quorsum inguina, axillæ, regio pone aures spectant, & glandulæ subcutaneæ ipsæ, si extraordinariè bubones fabricet malum extra illa loca, uti nonnunquam visum esse notatum est.

§. II. Ortum pestis & natales primos nemo adhuc dum mortalium investigare potuit inconcussis fundamentis, ut etiam ex eo aliquid divini elicere liceat, cujus effectum quidem, non minus ac venti, sentimus luctuosissimum, unde autem fluat, vel quorsum elabatur & tendat, non item. Tentabimus tamen ex causis ordinariis morborum eosdem arcessere, post, quàm viderimus hæc à posteriori collectas.

§. 12. Conveniunt omnes febres non minus ac alia morborum genera unâ immediatâ causâ, quâ positâ ponuntur, sublata auferuntur. Differunt verò foco, loco, gradibus & adjunctis circumstantiis aliis, quæ hanc, non illam efficiunt. Idem quoque de Peste valet, cujus **C A U S A M I M M E D I A T A M**, quoad effectus in corpore inde consequentes, asseruimus fermentum rarefactivum, venenosum, seminale, specificum, uno verbo pestilens, in actum quidem deductum.

§. 13. Fermentum dicimus tum à motu & activitate, tum immutatione. Quamdiu enim motum nondum sortitur, cæteroqui dispositum est, ut in corpore apto inducat, non tàm fermentum audit, quàm contagium, conveniens essentiâ, differens effectû, seu actuatione. Simul verò hunc infert, immutativum est, quod nempe humores alterat, & in sui naturam commutat. *Rarefactivum*, quatenus calorem efferat, quamvis ob conjunctam malignitatem id non se exerat semper urentioribus facibus.

Vene-

Venenosum, quia instar aliorum venenorum in elementa, vitalia sævit, eorumque destructionem seu resolutionem intentat violentam. *Seminale*, utpote multiplicativum sui & diffusivum, quod in fermentis quibusvis quoque visitur destructoriis & activioribus. Tanto magis id in vitali caractere signatis valet, unde ex massâ sanguinis corruptâ & infectâ infinita quasi consurgere possunt semina. *Specificum*, seu sui generis, quo ab aliis differt malignis, ut maligna sit quidem, à reliquis tamen vulgaribus hoc ipso indeque fluentibus distincta. *Specificum*, partim absolute, quoad veneni naturam in se, partim respectivè, quoad subjectorum & effectuum diversitatem. Huc referri potest pestis non humanæ speciei, sed huic illi, ovibus, felibus, bobus funesta, qualia exempla hinc inde observantur, ob alium modum sanguinis non tam facile in aliam speciem transeunte malo; ut non memoremus pestem segetibus & arboribus propriam, subito cum tabida membris corrupto cœli tractu miserandaque venit, arboribus satisque lues & lethifer annus.

§. 14. His omnibus præcipuum pondus addit, quod fermentum hoc pestilens non oriatur à concepto veneno in humoribus, prout in febrî malignâ sæpe contingit. Fieri id potest ab individuali cacochymiâ, seu labe sanguinis & feri, vel concurrentibus externis causis, sed ita ut nidum saltem struant, seminium verò conferant nullum; vel contagio & fermento simili, si ab aliis febrî eadem laborantibus morbus exuscitetur, quod cum peste habet commune. Inde duplici visenda facie est, vel *σποραδικῶς*, sparsim hunc illum corripuens, vel epidemia. Alia verò in peste paulò est ratio, quæ ordinariè nunquam sporadica observatur, nec epidemia ad illum morem; illato fermento debetur, non concepto in humoribus.

§. 15. Nec oritur hoc fermentum pestilens à concepto veneno in spiritibus, ut archæus faber ideam virulentam

lentam pariat, occasione terroris panici. Non enim extra pestem grassantem unquam à terrore vel timore legitur genita eadem, multò minus primitus orta. Grassante, verò eadem, id videtur quidem sapius, citra ullam communicationem contagis aliam, hunc illum peste correptum, attamen ob subtilitatem veneni videtur, non reverà est idem. Formidolosi, timidique & territi non semper corripuntur peste; nec audaces fortuna juvat semper, ut liberi maneant, quin utriusque exempla notata sunt in contrarium. Sique hæc eveniunt nihilominus, ut frequentissimum id fatemur esse, terror tamen non tam genitricis, quàm obstetricis munere fungitur.

§. 16. Enimverò pestis ab illato in corpus veneno oritur solum, illato extrinsecus per contagium, *μίασμα* fermentificum consimile, vel mediatum, & ad distans magis, vel immediatum. Nec obstat, id sensibus non posse deprehendi facilè, utut non rarò sub nebulæ, seu fumi specie, volitantis in aere, à quibusdam observatum fuerit, visum. Subtiliores sunt atomi istæ ac particulæ, quàm ut sensum incurrant manifestè, quod in aliis morbis extra controversiam quoque observatur, quorum fomes à contagioso corpore inducitur.

§. 17. Hoc loco non possumus quin illam tangamus hypothesin quorundam, non dari ullum aliquod contagium, morbumve contagiosum, quodque plures hoc vel illo afficiantur communi cum aliis morbo, id fieri potius ob frequentiam, quàm contagionem. Idem de peste quoque asserunt. Ast repugnant meritò utraque medicinæ fulcra, experientia & ratio. Mille testes vel vulgò prostant, unicè per contagium, seu, ut prescius dicam, per conversationem, per applicationem vestimentorum, per alios modos, pestem, ne de aliis dicamus, fuisse propagatam. Imò hoc solum medium est, quo & ipsa multiplicetur lues, densenturque funera, & imminui possit. Nec abaudit ratio, modò non ex præconceptâ opinione illam

negemus, vel illa supponantur, quæ non tollunt dubium.

§. 18. Dum fermentum dicimus, fatis id clarere potest, unaque illustrari dudum asserta ab aliis de contagii conditione & requisitis, esse id viscosum & volatile, id est sulphureo-salinum, quod omnibus fermentis est commune, viscidum quoad corporaturam externam magis, volatile quoad internam; viscidum magis actu, quo adhærere possit, volatile potentiâ, quando à calore nativo evolvitur & subtilifatur. Quando ergo ponitur agens tale, seu corpus contagiosum, nec abludit medium, seu mediatum, seu immediatum, nec recipiens, subjectum dispositum, omnia sub supremi numinis directione, derivari pestis & diffundi in plurima corpora potest. Et quod non omnes absolute inficiantur peste, qui cum infectis conversantur, in dictis hisce invenit fundamentum. Ordinariè enim universale illud periculum est, sub istis conditionibus, etiam illis, qui semel iterumque jam evasere, morbi quasi victores.

§. 19. Si itaque causæ proximæ immediatæ *MEDIATAM PROXIMIOREM* subordinare velimus, hoc ipsum contagium sufficere & exhaustum rem potest. Pro diverso respectu immediata evadit, quando in actum deducitur, communicatur humoribus vitalibus, & proprium, individuale redditur; Mediata verò proximior est, ut communis se habens, ut mediata adhuc, nec dum ad illum gradum activitatis evecta. Idque concipi fatis aptè potest, si pensitemus vel halitum, vel sudorem infecti corporis, utcunque applicatum, ut migrare in aliud queat. Unctuositas illa viscedinem præ se fert, unde nec diffilari in auras & annihilari tam facile potest. Quæcunque hinc corpora mediata magis apta nata sunt, quibus unctuositas illa halituoosa, udor, sudorque adhærere & insinuari penitiùs possit, ut vestimenta quæcunque, maximè pellicea, illa quoque magis visuntur malum inferre etiam planè insciis & audacissimis.

§. 20. Duo hîc inter alia disquiri merentur, qualem sit venenum ulterius hoc pestilens, & unde suam mutuetur originem, vel affinitatem. Illud optimè determinare poterimus, si comparemus inter se similia, quorum eadem est ratio, venenum pestilens cum venenis aliis, quæ triplicis, quoad materiam, in universum sunt generis, vegetabilia, animalia & mineralia. Illa cum primis vaporositate narcoticâ, hæc corrosivitate, media fermentificâ vi infamia sunt. Ast in peste affectis non uniusmodi sunt phænomena conspicua, aliis in somnum abreptis, aliis vigilantibus, his bubonibus, aliis carbunculis affectis, ut plura non huc arcessamus. Ex quo efficitur, in omni quidem peste esse venenum fermentificum malignum, utpote in subiecto animali reperibile, quod per se quoque subruere vitam aptum satis est, huic verò accessoria fieri reliqua, adeoque quod usquam venenosum reperiri in macrocosmo potest, id in peste dari posse, omnium venenorum apice & compendio.

§. 21. Unde verò scaturiat hoc ipsum specificum venenum, disquiri meretur, si quid aliud. Non incongruum fuerit hoc scrutari ad normam aliorum morborum, visis singularum causarum fontibus. Hanc in rem liceat nobis distinguere pestem in fientem & factam, seu genitam & propagatam. Ad fontem usque progrediendum fuerit, si rivi cujusque originem inquirere mens sit Quæ Germaniam nuper vexavit dira lues, non in Germaniâ genita fuit, sed propagata, non fiens propriè, sed facta, quamvis hoc illo loco, non inquirentibus curiosius, obscura fuerit illata contagies. Hinc epidemia lues est, non facilè endemia, quod noverimus, nisi per accidens.

§. 22. Aliunde dum infertur pestis, statuendum est aliquod πῆ, primus locus natalis, si quidem naturalia sectemur principia; sive ille locus fuerit iterum primus, sive talis visus. Referunt enim Orientis scriptores Cairi & aliis urbibus majoribus perpetuam quasi pestem esse, un-

de diffeminari per commercia labeſ poteſt haud difficulter. Aſt cum nec loci vitio eſſentiali id contingat, nec venenum morboſum connatum quaſi fuerit reliquis, ortum cum aliis morbis ſine dubio habet, ſaltim ſecundum quid, communem.

§. 23. Si dicere volumus, quid ſentiamus, peſtis origo derivanda videtur ex ipſo homine, tanquam nido morborum priorum genuino, ita, ut ex febrium malignarum colluvie, & veneno vires ſumente hoc omnium diriſſimum enaſcatur, & hinc vires ſumat eundo, concurrentibus & velificantibus reliquis cauſarum generibus, pro ſuo modulo.

§. 24. Ne id gratis aſſeramus, penſitemus in corpore humano ex corruptis humoribus gigni malignitatem, etiam in ſanis aliàs viſis, nec enormi ſemper errore diatæ prægreſſo. Nullo quaſi non tempore malignæ febres hic illic graſſantur, etiam gradu venenoſitatis non minimo conſpicuæ, cum petechiis, imò, quod vidimus, raris licet, parotidibus, cum aliis exanthematibus. Poſito tali fermento rarefactivo febrili peſſum eunt ſeu periculum ſubeunt maximum humores vitales, unde malignitas major, minorve, ſæpe ſaltim à poſteriori progignitur. Magis igitur peſtis origo elucere poſſe videtur, ſi cum febribus malignis comparetur, quarum non minus apex eſt, quàm cum venenis aliis.

§. 25. Dari verò caſus, ubi loco minoris majorisve malignitatis maxima generari poſſit, triſtis teſtatur experientia, ſive annonæ caritatem penſitemus, & comeſta peregrina, jubente neceſſitate, potaque varia abſurda & corpori inconvientia, unde illud vulgatum *μετὰ λιμῆ λοιμὸς*; ſive communem omnium radicem, bellum, quod poſt ſe trahit utrumque frequentiffimè. Quis dubitaverit exortam ſuperiori Germanico - Suecico bello ex hâc cauſâ non ſemel peſtem, & in Germaniâ natam primitus, accedentibus cum primis reliquarum cauſarum votis, obſtetricantibus

tibus contagio, & tristibus casibus aliis? Facit huc neglectus morbus, sive per incuriam, seu potius per paupertatem, uno hospitio degentibus pluribus, conversantibus domesticis, non minus ac aliis, cum ægrotis promiscuè, ut taceam neglectam purificationem conclavium, vestimentorum & similibus, quibus provehi ulterius *μιάσμα* possunt. Adeoque & hoc loco ex quibus vivimus & nutrimur, ex iisdem morimur.

§. 26. Semel hinc ad gradum & sphaeram illam summam morbus perductus, nec domitus, vel agnitus, continuatur facile, & deservit in alios, etiam dissitissimos, perlatâ illuc per commercia labe contagiosâ, & archéo in sui perniciem ovula illa pestifera, ut sic loquamur, excludente fotu & calore suo, vero hydræ Lernææ exemplo. Ita incautos corripit, & prius sæpe necat, quam cognoverint se ab hoste cæsos vel impetitos. Diffusivus enim calor & activus est, receptum secum in viscerum culinas venenum mox novis fomentis adaugens & multiplicans.

§. 27. Utut itaque & arsenicalium & aliorum venenorum virus illustrare pestiferi veneni vim egregiè possit, simile tamen non est idem, nec per omnia quadrant inter se phænomena assumpti in corpus veneni istius & pestis. Est in corpore id ipsum omne, quod extrinsecus arcessis, modò fermentum corruptivum vitales humores immutet. Quid enim sunt carbunculi, quàm summus inflammationis à sanguinis acrioris eccentrici *αίας* gradus? Quid bubones, quàm tumores glandularum à ferro acriori stagnante, nec decenter promoti? Quid petechiæ, quàm stigmata conceptæ uredinis malignæ, ut plura non laudemus?

§. 28. Et unde, quæso, tantum virus arsenicale, nappellinum, mercuriale, aliudve derivari posset, ne effectum diversum urgeamus? Quin observatum potius nunquam est, illis locis, ubi scaptenfulis suis mephitis illa venenosa spirat, vel effoditur & tractatur elaboraturque arseni-

cum, ejusque minera & species, pestem inde exortam, sed contrarium potius, loca illa, cæteris paribus, magis à pestilenti infectione liberiora esse, & eatenus salubriora. Præstò sunt in corpore salia, præstò sulphur, præsens calor, summè activa singula, & evolvenda in sublimiorem morbosam orbitam, per naturam, extraneo fermento laudato illato & ferociente.

§. 29. EX REBUS NATURALIBUS facere huc possunt, sed remotè admodum, TEMPERAMENTUM biliosius, & salibus magis foeta alia, ut & HABITUS CORPORIS, seu squalidus, seu obesior, quatenus vel fomittem invenit contagies majorem, ut destructiva spicula infingere & accendere præsentius possit, vel transpiratio citatior magis actuat obvium *μίασμα*. Eadem ratio est ÆTATIS juvenilis. Omnia hæc parum vel nihil ad pestem producendam, vel inferendam potius, conferunt, nisi quatenus ad privatam pestem, febres malignas puto, corpus aptius monstrant, inde & ad publicam, nostram hancce, mage dispositum.

§. 30. Si enim illam tantummodò pestem publicam habere velimus, quæ universali aeris infectione sit, infamis; privatam, quæ salvâ aeris puritate grassatur, non dubitaverim asserere, talem omninò non dari. Est in perpetuo motu aer non minus ac aqua, idque tantò magis, quo subtilius & levius est elementum, facillimè agitabilis. Privatam potius dicimus, quæ, ut *Psalmes* canit, in tenebris grassatur, i. e. insidiosè hunc illum, nemine advertente quasi, vel tamen non tam manifestè, corripit. Publicam, quæ in meridie, id est, palàm, aperto Marte, publicitus vastat, & stragem edit publicam, ut prior illa, sub febrium malignarum nomine veniens, privatam.

§. 31. Et hic locus est differendi quoque de causâ pestis astrali. Vulgus astrologorum non minus ac aliorum hoc sibi habet persuasissimum, pestem inferri ab astris, ab infaustis aspectibus, signis, ecclipsibus, conjunctionibus,

bus, quadraturis, oppositionibus planetarum & fixarum. Quasi purissima sidera, igneæ naturæ & lucidæ, pestis seminariis toto cœlo adversæ, hanc humano generi inspirent labem. Sanè tum hoc in passu, tum aliis similibus mirandum est, Christianos non averti posse ab Ethnicâ Chaldæorum superstitione, & astra incusare innexia, non advertentes astrorum Dominum, quem illi ignorabant. Summa & dolenda hæc est idololatria, modò præconceptis opinionibus animus vacet. Annon enim, per Deum immortalem, ipsissimos Ethnicorum Deos, Saturnum, Jovem, Martem, Apollinem, Venerem, Mercurium, Dianam in solium numinis locamus hoc ipso, dum effectus adscribimus ipsis planè non convenientes.

§. 32. Habet suum usum ut aliàs, sic & in medicâ arte astronomia non minimum, quatenus vita macrocosmi & microcosmi in calido & humido consistit, hocque ab illo modificatur & alteratur suo modo; sed remotius, nec nisi archéo harum illarumve partium vacillante, unde humidum vitale imperium exuit aliquatenus, & alienum sequitur. Alia longè in peste est ratio. Inconvenientius adhuc fuerit, si universalem illum afflatum pestiferum, quem putant, certis locis fœnerari velimus, quod dominantur & præsent his illis climatibus, velut Patroni, certa signa Zodiaci, mirum quod non planetæ, quorum vota longè majora sunt. Sed omnibus imperitare horum erat.

§. 33. Quod itaque AEREM concernit, ratum illud per hodiernam experientiam accuratam est & manet, contagium pestilens non hære immediate in aere solo, quamvis contagii vehiculo, ab eoque dependere, quod satis tractus morbi declarat, non tam illuc latus, quò aer, quàm effluvia. Negari tamen nequit, & alterum experimentum, aerem his illis locis motum, frigidum & ficcum, cum primis Aquilone spirante, pestem simul ac semel mensibus hybernis sustulisse; humidiori verò & austrino statu
magis

magis fæviisse eandem. Ex quo illud colligitur, habere inter se quandam communionem aerem, & auram pestilentem, ut & propagari ab eo magis, & extingui, jubente quidem supremo numine, possit. Neque tamen promiscuè aere frigido emoritur pestis, sed gradu intensiori gaudens, ut & in eo *πνέον* deprehendere liceat manifestè.

§. 34. CIBUS & POTUS quomodo ad pestem gignendam concurrant, jam adduximus, eâdem verò grassante sæpenumero occasionalem causam & hæc constituunt, siue defectu exhauriatur corpus viribus, ut resistere minus possit; siue excessu accumuletur cacochymia, gravato sic corpore & ad resistendum minus apto archéo. Panis calidi usu visum fuit non rarò attractum quasi *μιασμα* pestilens & in corpus derivatum. Æstivo tempore fructus ætatem non ferentes, largius comesti, dum, cacochymiam congerunt, corpus ad suscipiendum contagium magis aptant. Facit verò victus ratio & alia in, causarum morbificarum classe ambulanti etiam illo pacto ad pestis productionem, quatenus morbos alios in corpus inferunt, quorum consortio pestis apprimè gaudet. Et hæc ratio quoque esse potest, cur tempore pestis reliqui morbi omnes quasi fileant, quod nempe & aeris status suo modo concurrat, & inde hic potius tunc temporis, quàm alius quivis foveatur; quique ex individuali vitio oboriuntur, accessione contagii in pestem abeant, quam comitem adsciverant, morbo, ceu lumine, majori obscurante minorem.

§. 35. Idem valet de aliis quoque. SOMNUS & VIGILIAE invitant morbum remotius, quatenus exorbitationem archéi inferunt & principiorum vitalium. MOTUS nimius lassando; QUIES torporem inferendo spiritibus conferre aliquid potest, per accidens & secundariò, quod de omnibus similibus valet, ut EXCRETIS nimis utilibus, RETENTIS onerosis inutilibus. Utque maxima vis est spirituum in tutandis vel deferendis corporis viri-

viribus; ita AFFECTUS quivis ANIMI graviores huc faciunt, maximè qui à circumferentiâ ad centrum rapiunt humores, ut stationes suas deferant excubitores extremorum, hostique fugâ suâ liberiores nidulationem concedant. Puerperæ, gravidæ, menstruatæ facilius vel corripuntur, vel correptæ interire, quod munus debitis præesse minus possit tunc archæus, in rapinam morbi facilius cedens.

§. 36. Tacemus, quæ de sagis, carnificibus, libitinariis recensentur, quod exectis carbunculis & bubonibus augere funera vel pestem excitare dicantur nonnunquam. Illa enim vel seminium ipsum fermentificum ita aptant, ut affici prætereuntes per naturam veneni possint, vel ex pacto diabolico etiam ludicra adhibentes nocent tamen, armantes sic hostem capitalem, ut nocere possit infra hominis quasi potentiam hoc experimento positus, modò ipse velit, nec dedat sese aliosve illius libidini, in quantum superior vis permittit.

§. 37. Operæ pretium fuerit etiam DIFFERENTIAS pestis lustrâsse breviter. Quamvis verò non unius videatur generis esse sæpe, sed aliquid novum, insolitum, & prius non visum in hac illâ occurrere; attamen eandem ludit fabulam pestis, ac morbi alii quivis. Imò longè distinctius noscenda, quo arctioribus acutiei, & brevioris durationis, causarumque includitur terminis. Quæcunque occurrunt differentiæ, unice propemodum fuerint desumendæ ratione *subjecti* tum individualis & totius, tum particularis, hujus vel illius membri. Idem agens morbosum diversa effecta ac phænomena sortitur hoc loco, non quod tot species sint distincti veneni, tot causæ lædentes diversæ, & frequenter sibi velut è diametro opposita symptomata; sed quod tot modi sanguinis, tot modi fermentorum modificantorum, tot partes suscipientes virulentum seminium.

§. 38. SIGNA ergò spectemus potius, quibus deprehen-

prehendi bestia infatiabilis possit, tanquam ex ungue leo. **ESSENTIALE** pestis est malignitas summa, acuties summa, contagium summum, quæ tria se invicem ponunt & illustrent, sub febris larvâ conspicua. Quæcunque enim febrium malignarum sunt signa, eadem & pestis, cum quâdam tamen differentiâ specificâ. Sunt enim hæc vel communia, vel diversa, seu potius specifica & propria. *Communia* sunt, ægrum corripere horrore levi, imò levissimo etiam sæpe, nonnunquam etiam majori paulò; insequi *δυσμετρίαν, ἀνισομελίαν, inequalitatem*, quæ malignitatis est propria, signa sibi non correspondentia, calorem subdolum, pulsum celerem vel frequentem, dolorem capitis, anxietatem, respirationem difficilem, vires dejectas, sitim, vel etiam ejus defectum, prostratum appetitum ciborum, vigilias, in aliis somnolentiam, deliria & alia.

§. 39. Hæc omnia, quæ instar aliorum esse queunt, communia habet pestis cum sui generis febribus malignis, sed gradu intensiori & peculiari caractere sigillata. A priori quidem, si communiter jam grassetur morbus, quocunque quis corripiatur symptomate, pestem esse cogitet, vel latentem præcaveat ac attendat, etiamsi vel ipse sibi sic satis valere videatur, viribus aliisque actionibus apparenter adhuc sibi constantibus, tanto celerius hinc dejectiendis. Sin aliunde illata vestimenta, suspecti ingressi ex loco vicino aliove infecto occasionem dederint, insidiosæ hostis conjecturam facere oportet. Si prius feratur mortuus æger, quàm ægrotans, saltem periculosè; si morbus terminum servet acutissimæ pestis proprium, intra triiduum vel quatridduum ad summum necet, mox abeat ad plures, quanquam inducias videatur largiri & moram trahere aliquam, iidemq; communi strage & sorte decumbendi eadem intereant, vel si aliam experiantur paulò fortunam, dilato ad dies plures morbo, eundem tamen postea offerant, pestem esse arguendum est.

§. 40. Confirmant idem exanthemata majora & minora,

nora, feri & sanguinis corrupti & infecti characterem præ se ferentia, bubones, carbunculi, petechiæ, serius ocyus erumpentia, quæ essentiam consequuntur magis quàm constituunt. Plurimi enim moriuntur prius, quàm feralem præconem morbus ad extimam vestem miserit, unde non valet, nullus in corpore repertus fuit bubo, nullus carbunculus; Ergo non peste mortuus fuit æger. Vis morbi sæpè major est, ut prius necet, & vitalem flammam subruat, quàm erumpat in nervum foràs.

§. 41. Speciatim hanc illam partem sedem esse furentis veneni illuc amandati, ex locis affectis patet. Ubi dolor, tumor, læsio actionum, ibi morbus, non radicaliter putat, sed per *κοινωνίαν*, adæquatè. Vomitus, ophthalmia, mictus cruentus, alvi fluxus, dysenteria, motus convulsivi, cardialgia, deliria, & nulla non alia id satis edocent. Non aliter ac ignis, quocunque loco arserit, celari nescit, sed furit, defævit, pessundat, convertens in sui naturam obvia objecta quælibet, & impertiens nomen suum cum substantiâ. Bubones glandulis insidentes exterius magis prominent, carbunculi non solum in corporis superficie, sed & interius visi sæviisse, causa sæpè symptomatum sese magis exerentium. Causæ reliquæ humorales stant post principia, passivè se magis habentes, immutatione ipsis inductâ potius, quàm inde derivatâ.

§. 42. Quod respectiva & PROGNOSTICA signa concernit, verè hîc valet illud Hippocraticum: In morbis acutis non est certa prædictio vel salutis vel mortis, puta, quamdiu proportio archei & morbi mensurari curatius nequit. Hic omnibus contrà atrox, funestus, lethalis est, quo plurimi moriuntur, pauci evadunt. Et illi quidem pessimè degunt, qui mitissimè habere se putant, latet enim anguis in herbâ, & tantò sævior morbus, quò magis ipsum mali sensum archeo demit. Una salus in displosione veneni in corpus hausti, quod per insensibilem transpirationem rarò, frequentius per sudorem fit, & κατ' ἀπέρσιν per

bubones, unum vel plures, locis ignobilioribus erumpentes.

§. 43. Æstimandi hi sunt eruptione maturâ, protuberantiâ, colore, more, *ἐν Ποσειά*, numero, morâ decenti, & aliis. Dissipantur nonnunquam per bezoardica; qui suppurantur, post hos meliores; pravi duri, rebelles, scirrhusi, qui que non levant. Meliores hi carbunculis, utrisque sæpe non cedunt maculæ. Ex his fundamentis omnes sunt, dijudicandi, unde mali quoque & bubones & carbunculi sensim arescentes, colore livido vel nigricante visendi, ut naturali statui propiores contrâ habent.

§. 44. Vitalis facultas bene habens in pulsu, respiratione & calore, etiam si p. n. & febrili, viribusque, bene sperare jubet, cæteris tamen paribus. Neque enim pulsus naturali reverâ similis, de quo in vulgus abiit proverbium, facile occurrit in peste, eademve malignius decumbentibus. Æqualis, celer & magnus melior est longè frequenti, debili, vel raro quoque. Somnolentia, vigiliæ, deliria, medio modo se habent; motus convulsivi pessimi. Appetitus bonus visus vix aliquid boni notat; sitis præsens melior est absente, vomitus, alvi fluxus, ardores, cardialgia, anxietas, inquietudo ut plurimum malè cedunt. Hæmorrhagia ob acrimoniam venenosam rarò critica est, frequentius symptomatice & pessima. Pejor vomitus & mictus cruentus, desperatum signum.

§. 45. Videas tamen mori frequenter cum optimis signis, citra apparatus horum illorumve symptomatum obviorum. Nec quartanarii, lue venereâ, scabie infecti adeò tuti sunt, quamvis excernicula feri ichorescentis facilius monstrent viam archeo, quod & de fonticulis valet. Animi deliquia, frigus extremorum, excreta per alvum vel os foetida, nigricantia, pessimum præbent omen. Reliqua cum febribus malignis sunt communia magis, quo loco & æstimanda *Βαγνολία*, bonum signum, si cætera consentiant.

§. 46. *Tempus eventus morbi sibi relictî ordinariè est*

est breve. Si tertium vel quartum diem superaverit æger, morbus in peracutos abit; sin septimum, in acutos, & sic porro, non quidem absolutâ spe evadendi & certæ jam exurgentis salutis, sed respectivâ tamen, melius armato & subsistere discente archeo. Visuntur tamen plures mori etiam citius, partim violentiâ morbi tam heroici, si ita vocandus est, partim fallaciâ, cum initium haud rarò putetur, qui finis est. Sin terminum acutarum, seu quatuordecim dies supergressus fuerit, quod tamen quoad bubones ferè magis valet, etiam longius productos, roborato archeo, etiam ad quadragesimum nonnunquam producitur.

§. 47. Terminatur ad *mortem* resolutione magis, quàm suffocatione, subrutis principiis vitalibus, & fatigantibus viribus, ne putante sæpè ægro, levissimo fato abrepto. Ad *salutem* disjecto veneno, vel per *demissionem* ad littus corporis ejecto. Spes dubia certâ perniciæ potior est. Melius est bubonem, quàm sudorem morticinum erumperé, modò archeus par sit ferendo oneri, & oppugnando hosti, in cujus robore, favente Deo, unica salus & vitæ spes inchoandæ residet.

§. 48. Restat potissimum CURATIO, tum præservandæ, tum actu tollendæ pesti intenta. Turpius ejicitur quàm non admittitur & hic hostis, unde primâ semper hujus adhibenda est cura, ne morbus accedat & impetat, hunc vel illum seu locum, seu hominem; altera, ut in primâ herbâ suffocetur. Præservationis omne fundamentum, si causas naturales, post Deum, attendamus, consistit in contagiî amotione. Cum enim morbus sit omnium contagiosissimus, omnia illa quæ mediatè vel immèdiate illud continent, ac inferre possunt, quantum licet, vitanda sunt.

§. 49. Optima hinc est fuga, quorum non interest ratione officii & conscientiæ remanere, & prius quidem id facere debent, quàm ipsi jam semina hauserint conta-

gis, & sibi & aliis nocituri magis. Optimum, ut commercia interdicantur publica cum infectis locis, nec admittantur ex urbe, domo, pago, lue hâc laborante, quæcunque, nisi indubitata fide, morbum penitus sublatum, nec superesse ullum seminum. Et quæ perferenda nihilominus fuerint, ut literæ, prius igne & suffitibus expiare fas est. Utut enim ex domibus non infectis nullum sit periculum timendum, in dubio tamen & hîc tutiorem sequimur viam.

§. 50. Utque eò melius caveantur hæc *μιάσματα*, unice ex infectis ægris oriunda, non tantum corpora materiata arcenda sunt, cum primis vestimenta, sudore venenoso infectorum ipso, vel effluviis tamen similibus, imbuta, imò quoque bruta, feles, & homines ipsi eadem domo versati; sed & commune omnium pabulum aer tutandus & corrigendus est.

§. 51. Proximum enim est, cum, illatâ in civitatem labe, (aliàs enim id frustra fuerit,) non tam exactè caveri possint omnia, quin ipse aer vehiculum fiat, in proxima loca deferens semina venenosa, ut illa studiosè adhibeantur, quæ infringere ac annihilare eadem, sicque præservare sanos, contrà ea verò armare & roborare archeum norunt. Ita ignis est destructor seminum genuinus & certissimus, consumens eadem penitus, ex quibuscunque demum focus struatur. Omnia enim *Φλογιστὰ* pollent sulphure & sale volatili acidove. Hinc suffitus sicci ex iisdem, pulvere pyrio & similibus; humidi verò ex *†*to simpl. rutaceo, bezoardico, lateribus affuso, modò non affectus pectoris, asthma, tussis, aliaque horum usum contraindicent, eximii sunt.

§. 52. Hæc uti aërem ipsum in motum cient & disjiciunt inhærentes moleculas, unà vero putredini, & verminosa quidem ipsi, sunt contraria, archeo amica; ita amuletis solis minus fidendum est. Quamvis enim *‡*ius appensus vivus, rad. colchici, magnes *o*-calis, camphora, trochi-

trochisci de bufonibus, xenexta &c. effluviis suis possint, aërem alterare, & lymphæ torporem excutere, ne *scilicet* pestiferam concipiat tam promptè; major tamen laus debetur internis, ut si mastificentur ore costus arab. myrrha, balsamum vitæ genuinum, rad. carlinæ, angelicæ, zedoariæ, vel assumantur *℥i* bezoardicus, essentia bezoard. ✕ bezoardicum, pulveres præservativi ex bezoardicis aliaque. Et in his quidem illud observandum fuerit, ut, cum maxima pars pauperum sit, pretio non excedant, & distribui inter plures possint, & variis formis aptari. Talis est pulvis præservativus noster, ex *spec. liberant. s. al. rad. angel. zedoar. carlin. contrajerv. cort. citr. bol. armen. myrrh. elect.* ex quo etiam omitti contrajerva & costus arab. addi potest, indeque parari electuarius, rotulæ & alia. Tacemus *pilulas antipestilentiales de tribus, elixir. propriet. camphor. theriacale, bezoardicum*, vel solâ mixtione tale reddendum, & alia hinc inde descripta.

§. 53. Curatio verò ex hæctenus laudatis & febrim quidem respicere debet, more aliarum similium, maximè tamen expugnando & disjiciendo fermento venenoso occupari, (seu vaporosum, seu corrosivum, seu immutativum magis fuerit in effectu) in vitalia recepto, quantum fieri potest, ne pessundet eadem, sed subjugetur ab archeo ac vincatur, ex quo fundamentali axioma facile iudicium de præfidiis huc quadrantibus fieri potest.

§. 54. VENÆ SECTIO nullum malignitati, quæ tali, decrementum infert, nec virulentum miasma tollit, quin sanguinem depauperando eò majores isti vires largitur, quò minores reddit corporis. Unde eam funestam experti sunt non pauci, qui in mittendo sanguine spem posuerant non paucam. Sin febrilis calor illam urgeat & morbi genius, cum plenitudine onerosâ, cum inflammatione faucium, & similibus, admitti aliquando potest, sed in principio, sed parcè, & in vasis minoribus, urgentibus hæmorrhagiis, vel deliriis, viribus constantibus, circumspectis-

ſpectiſſimè. Idem dictum ſit de CUCURBITULIS cum ſcarificatione, quæ & in peſte & in febris malignis exolevère. Nec ſiccæ etiam dolorificæ bubonibus æquè & promiſcuè conveniunt, quod magis advocent humores, quàm digerant, vel diſſent.

§. 55. Melius ſe gerunt ichori maligno debita VESICATORIA, tum nuchæ appoſita ac pone aures, tum brachiis & pedibus. Ita enim & revellunt ad extimam veſtem malignum humorem, & archeum admonent ſui officii, non minus, ac lympham ipſam ventilant, & torpore excuſſo in motum vitalem cient. Proſunt enim non ſolùm generali uſu ad divertendum & eliciendum venenum, ſed & ſpeciali in doloribus capitis, deliriis, convulſionibus avertendis & leniendis, in ſomnolentiâ quoque ipſâ proſtigandâ, probatiſſimæ virtutis, in adultis & pueris ipſis, unde & directo uſu ſtatim in principio applicata ſunt ſæpe feliciter. Specialiſſimum uſum præſtant eadem bubonibus apparentibus impoſita, repetita, quoque pro re natâ. Sic enim correctâ ~~ſcæ~~ emollientia hinc impoſita melius prodeſſe poſſunt.

§. 56. Habent etiam uſum ſuum ferrum & ignis ad peſtis curam. FONTICULI magni fiunt communiter ad præſervationem; aſt fidere iisdem nemo auſit. Quicquid faciunt, præſtant amandando ſenſim ichorem foràs, ne ſtagnans vitium tam facile capiat. Inuſtio vel exciſio carbunculorum, in Vienneniſi peſte uſitata, crudelis quidem eſt, & hæmorrhagiæ largioris metum incutit: aliquando tamen & hoc loco enſe reſcindendum eſt corruptum, ne pars ſincera trahatur. Omittimus ſectionem, neceſſariam pro aperiendis bubonibus maturatis, & quæ alia ex his loculis uſus ſuggerit.

§. 57. LENIENTIA & PURGANTIA aliis potioribus ſubſtant, minoris in peſte uſus. Cum enim rarò diarrhœa tunc ſit critica, ſed frequentius mala minetur, indicio corroſivitatis humorum majoris, cum primis bilis;
contra

contrà ea verò respectivè melius habeant, quibus alvus adstricta est, hæc quoque in praxi attendere oportet. Novimus qui ad plures dies cum successu hanc inertiam, si quæ adfuit, neglexere, vix nisi suppositoriis stimulatâ alvo. Satis sit, purgantia pesti minus convenire, & si horum usus urgeat, ob adstrictionem, ob cacochymiam, illam tamen indicationem esse secundariam, quæ primariæ alteri cedat. Quin facillimè his dejici potest archeus, acrimonia augeri, fermentatio intendi & sic consequi hypercatharsis, virium dejectio, mors ipsa. Adeoque non temerè purgandum in curandâ peste; alia autem ratio est præservationis, ubi balsamica aloëtica, quæ feliciter sumi solent ante cibum, & alia præstò sunt. Clysteres & laudata suppositoria officium faciunt. Si quid amplius faciendum, leniora, fennata, & benigniora *κακονεωλινά, extract. aloes laxat. cum bezoardicis, spec. diasen. Treæ &c. suffecerint.*

§. 58. VOMITORIA tutiora deprehensa sunt tum leniora in genere, tum in primis *Θ*lata. Illa quidem, quod biliosa amurca sæpe in primis viis hæret, in mineram & augmentum veneni cedens, quâ per emeticum lenius ablata, brevi morâ, anxietas levatur, & bezoardicali-beriolem operandi vim sortiuntur. Hæc verò, quod tonum ventriculi & lymphæ respiciant, roborato elatere, quem citaverant, roboratâ lymphâ, quam eduxerant. Neque aliâ ratione forsân profuerint *Θ*lica, à quibusdam felici empiriâ in curam pestis adhibita. Dari tamen & hæc cum alexipharmacis aptis amant, ac non sine cautelâ debitâ.

§. 59. DIURETICA itidem directo fine minus in peste conferunt, nisi quatenus cum alterantibus conveniunt, uti nitrosa apprimè se gerunt, & ex his *Θ*giatum, *arcan. duplicat.* & *Θ*latum; & ardor urinæ, vel ischuria faceffant negotium, quod non paucis accidit, latente sæpe intus carbunculo, ubi *▽ cerefol.* instar omnium est, cum

giatis, ocul. ☿ & bezoardicis remixta, uti & utrique intentioni communia locum habent, v.g. *essent. fulig. volat.* ☉ *volat. succin. liq. C. C. succinat. M. S. & alia.*

§. 60. Ipsa verò SUDORIFERA, vel ex his potius BEZOARDICA, utramque absolvunt in peste paginam, interpolata cum alterantibus. Cum enim *ύίασρα* seu fermentum venenosum salino-sulphureum, septicum, corruptorium, lymphæ maximè immersum, improporportionem massæ sanguineæ, rarefactionem vitiosam & partibus glandosis *σύν* inducat, unà verò humorum vitalium & ex his scaturientium resolutio, quæ in aliis febribus malignis successivè infertur, hîc magis subitanea & violenta sit, unica ab his, sub divini numinis auspicio, salus expectanda est. Hæc enim putredini strenuè obviam eunt, partes sanguinis balsamicas tutantur, feri & sanguinis stagnationem & torporem promovent, excusso simul salino acri, corrosivo stimulo, ne vel in coagulum fatiscat, vel hîc illic restagnet in glandulis, vel ad certum aliquem locum inflammationem derivet, adeoque resolutionem sanguinis & feri quovis modo impediunt.

§. 61. Probatoria ex bezoardicis sunt ☿ *viperar. essentific. C. C. eboris*, eorumque ☉ *volatile* probè depuratum, ne ob partes oleosas feriat caput, *liquor C. C. succinat.* & cum hoc factum *elixir propr. essentia & Ra bezoardica essentificata, volatilis, mixtum simpl.* ☿ & *essentia theriacalis, electuar. Orvietan. diascord. theriac. mithridatum*, cautius tamen præ reliquis, *electuar. de ovo, theriaca cœlestis, pulvis præservativus, bezoard. Senn. Pannon. ruber, Mantuan. spec. liber. de hyacinth. mag. spin. viperar. C. C. ½ diaphoret. bezoard. min. Fle, Olare, flor. Aris, lap. bezoar or. & occ. lap. cord. Indic. ☉ bezoard. arcan. dupl. Mynsicht. ▽ flor. sambuc. bez. acac. citr. scorzon. bezoard. Rulandi, prophylact. decoct. bord. c. C. C. scorzon. flor. cord. pom. citr. ☿* ☉ d. &c. non omissis nervinis *castoreo, specif. cephal. anodynisq;* ipsis, providè remixtis, habitâ distinctione symptomatum, individuorum & remedio-

mediorum ipsorum, maximè verò indicantium, nec neglectis symptomatibus urgentibus, quibus è suis fontibus satisfit; habitâ tamen semper ratione malignitatis, nec neglectis hinc vel omisfis etiam in aliis bezoardicis.

§. 62. Danda sunt hæc talia maturè, ad diffilandum vel expugnandum fermentum venenosum, injuncto sudore, repetenda singulis tribus, sex, octo horis. Cavendum tamen est, ne nimio sudore exolvantur vires, vel pariori non excutiat torpor fero, vitatis extremis. Calidiora in æstu majori & effératione, in gravidis, rarioris texturæ corporibus & aliis minus ex usu sunt. Præstat interpolare sibi invicem temperata cum volatilibus & mediis. Urinosa & similia longè activiora acidis, non tamen promiscuè altera alteris anteferenda. Est suus & acidis usus in calore exuperante & rarefactione nimia, in hæmorrhagiis, ubi volatilia alia minoris sunt virtutis; unde prudentiâ opus est, nec indifferenter omnes acidis vel volatilibus tractandi, sed variandum pro malignitatis genio. Ita oppugnanda malignitas, ne negligamus intemperiem; ita hæc tractanda, ut potior semper habeatur ratio malignitatis.

§. 63. Atque sic non omisfis roborantibus, diluentibus vel refrænantibus, cum primis bilem simul attendendo, quæ acrimoniæ illius venenosæ characterem exprimit facillimè, nec temerè nec timidè tractandus morbus, eadem cum febribus malignis methodo, sed longè majori prudentiâ & vigilantia, nunquam fidendo fallacissimo hosti. Quem in finem & externa, balsama antiloemica, litus, ex *rut. sambuc. camphor. C.C.* ad dorsum, pulsus, tempora, cum *spec. pro epithem. cord.* & aquis appropriatis consultò quoque applicantur.

§. 64. Verbo etiam bubonum & carbunculorum memoranda tractatio, ita semper obeunda, ut internis præcipuè eadem perficiatur, non neglectis externis. Bubonibus competit *empl. diachyl. simpl. & compos. ad bubon. Senn.*

magnet. catapl. ex cepis & theriacâ, ex herbis emollientibus & bezoardicis, cum rad. cynogloss. ficubus, herb. parid. &c. Carbunculis emplastrum de fuligine, magnet. per se & cum aliis. Ad defensionem verò vicinarum partium unguent. de lithargyr. empl. defensiv. Mittimus alia, quæ consolidationem, mundificationem, cicatrificationem, non maturandam tamen protenus, è suis fontibus procurant, ut empl. citrinum, sicut. Apostol. &c.

§. 65. In DIÆTA AER cavendus frigidus, ut transpiratio libera continuo æquabili calore fervetur integra. CIBUS & POTUS convenit tenuior. Studiosè cavendum, ne incuriâ vel negligentia in his vel reliquis malum increſcat & superet archeum.

SOLI DEO GLORIA.

Q

Ua clades aliis fuerat Tibi gloria magna est,
dumque legis spicas messis opima manet.
Gloria namque obitos sequitur condigna labores,
& messis cornu divite plura dabit.

Honoris & affectus ergo scribebat

P R Æ S E S.

A

*Rs cælo behitur, (nam sedem legit in arce
Ætherea) & donis emicat illa suis.
Nobile carpit iter, quin cælo concipit ignes
Gratos, corque gerit de meliore luto:
Illuc qui tendit, cui terra terrea sordent
Munera, cui melli est artis adire domum.
Celsa via est, sed celsa petit, qui scandit ad artem;
Offeret Ars niveâ pramia digna manu.
Hoc VVINTERBACHI facis & melioribus ausis
Ad nitidum properas mente manuq; decus.
Qui supposebas nulli non terga labori,
Digna artis medica prodix aperta tua.
Nam de peste locat tua Dissertatio nomen
Cælo: Mens etenim nobilis alta petit.
Maeste tuis captis! semper sine peste vigebit
Nomen, & in studiis (sed sine peste) vige.
Sic Veteri veniet nova laus, nova gloria laudi,
Lucebitque nobâ Patria luce tuâ.
Sic fluet hic * RIVUS placide, Pestemq; liquore,
Tollet: stringat eum non glacialis Hiems.*

* Allusio ad nomen
VVinterbach.

Hisce brevibus Clarissimo Dn. Respondenti, Conterraneo
æstumatissimo applaudere voluerunt



CONTERRANEI.